

## ESAM SPECIÂL DI CULTURE FURLANE

Cun dut chest, nancje se la Furlanie e podès otignî un ordenament federâl, noaltris no varessin par cumò il coragjo di proponi la adozion dal furlan come lengaç uficiâl: parcè che o provìn ce che al vûl dî a doprâlu leterariementri par tratâ arguments di ogni fate, parcè che o savìn cetant pôcs che a son i furlans che, intai ufizis, intai documents e intes relazions uficiâls si cjataressin inte pussibilitât di quartâsi fûr fevelant par furlan cuntun fregul di proprietât, e parcè che no voressin viodi il nestri lengaç strapaçât, folpeât e contaminât plui di chel che al è. Prime di dut bisugne che i furlans a imparin a fevelâ pulît par furlan.

Ma o domandin che l'ordenament autonomistic che nus vignarà dât, al rispieti il furlan, che i permeti di mantignîsi e di confermâsi, che lu favorissi. O domandin che intes scuelis publichis al vegni adotât ancje cualchi librut di leturis (flabutis, liendis, poesiis, contis) furlanis, che intes scuelis secundariis al vegni zontât al plan di studis un ristret di letulture furlane (storie leterarie e antologjie) e che e vegni spiegade in misure plui largje la storie e la gjeografie dal Friûl; e par che il personâl insegnant al sedi in grât di svilupâ chest insegnament, o proponin cors straordenaris, magari di sere, di culture furlane (lenghe, letulture, storie, gjeografie, art e folclôr) e che par ducj chei che a vuelin jessi impiegâts intes scuelis de Regjon al sedi, di achì indenant, necessari vê superât un esam speciâl di culture furlane.

Chest al è il mancul che si puedi pratindi intun ordenament autonomistic, e o sperìn che al zovi ancje par diliberânus di tante forestarie che in vuê e comande a in plen intes nestris scuelis.

josef marchet - Patrie dal Friûl / 1946